

**1 Tesalonaeka**  
**Naoa itəm Pol təmaupən mətə**  
**tuwın kəm iəfak mın ikın**  
**Tesalonaeka**  
**Nəghatən əkuəkır rəha naoa u**  
**1 Tesalonaeka**

**?Pah təmətə naoa u?** Aposol Pol təmətə naoa u.

**?Təmətə tatuwın kəm pah?** Təmətə tatuwın kəm niməfak əpəh Tesalonaeka.

**?Nəmegəhən tahro nulan nian təmətə?** Pol təmətuoun niməfak əpəh Tesalonaeka e nup kəiu o kisil əm tinuwın rəkis, kən in niməfak wi kit. Netəm rəha niməfak okotəkəike kəwiə e nəmegəhən rəhalat. İlat neen, kəmotuwın e nian iəkis mın mətə-inu kotahatətə e Kristo. Kən neen kəsotitun wırən nian itəm İesu otitəlig-pa mın lan e nətueintən. Neen nikilat təht məmə İesu otuwa uəhai mın əm. Kən motəruru məmə netəmim kəmotimıs uarisig e İesu titəlig-pa mın, okahro ilat.

**?Təmətə naoa u o naka?** Pol təmətə naoa u məmə otıləs-ipər nətəligən rəhalat, kən mol nahatətən rəhalat təkəsik. Kən molkeike məmə otos-ipən nəgətunən neen itəm tətuatıp e nitəlig-pa mınən rəha İesu Kristo.

*Pol təmən təwır kəm ilat*

<sup>1</sup> İo Pol, ne Saelas,\* ne Timoti, etəhalən təwır kəm itəmat u niməfak əpəh ikın Tesalonaeka. Itəmat

---

\* **1:1:** E nəghatən Kris, nərgın u Saelas in ‘Silfanus’

nəmotuwa kitiah o Tata Uhgın ne İərəmərə İesu Kristo.

Pəs Uhgın otawte-in rəhan nəwırən ne nəməlinuən kəm itəmat.

<sup>2</sup> Nian rafin etəhalən-ipən kəm Uhgın məmə nikitiməhal tagien otəmat, kən mətəhaləfak otəmat e nəfakən rəhatiməhal. <sup>3</sup> Nian etəhaləfak kəm Tata Uhgın, nikitiməhal tagien məto-inu nian rafin nikitiməhal tatəht nat kisil, kit u rəhatəmat wək itəm tətisi-pən e nahatətəən rəhatəmat, ne rəhatəmat wək əskasik o nasituən e netəmin itəm tətisi-pən e nolkeikeən rəhatəmat, ne nolən rəha nətul əskasikən rəhatəmat e nian iəkis min itəm koatuwa e rəhatəmat nəmegəhən, kən nəkotol nəhlan məto-inu nəmotələhəu-pən əskasik rəhatəmat nətəligən e İərəmərə İesu Kristo.

<sup>4</sup> Piak min ne wınik min itəm Uhgın tolkeike itəmat. Nikitiməhal tagien min otəmat məto-inu ekəhalitun məmə Uhgın təmitəpun itəmat.

<sup>5</sup> Kən ekəhalitun nat u, məto-inu namnusən təwir itəm eməhalən kəm itəmat, sənəmə təmuwa e nəghatən əm, məto təmuwa min e nəsanənən, ne Narmın Rəha Uhgın, kən kitat kotitun wir məmə in nıpahrienən. Kən nian emotatig kitat min itəmat, nəkotitun məmə nolən rəhatimat in təwir məmə otasitu etəmat. <sup>6</sup> Kən itəmat nəkotasgəwın itiməhal ne İərəmərə e nolən u: nəmos pap nahməən asol, məto nəmos nəghatən e nikin agien itəm Narmın Rəha Uhgın təmos-ipinə. <sup>7</sup> Tol nəhlan, e nolən rəhatəmat nəmotəgətun suatıp wir kit kəm iəfak min əpəh Masetonia ne Akaea məmə kotasgəwın itəmat. <sup>8</sup> Nəmotən-iarəp nəghatən rəha

---

**1:1:** Wək 17:1-9

**1:3:** 1 Kor 13:13; Kol 1:4-6

**1:5:** 1 Kor

2:4-5

**1:6:** Wək 17:5-9

Uhgîn tahmen e tawi tãmasæk kãto ikîn min rafin, kãn sãnãmã ãpãh Masetonia ne Akaea ãm, mãto netãmim ikîn min rafin kotitun rãhatãmat nahatãtãen. ?Kãn ekãhalãkãike mãhalãn-iarãp namnusãn rãha nahatãtãen rãhatãmat, o kãp? <sup>9</sup> Kãp, mãto-inu ilat atip koatãn-iarãp mãmã nian emotuwa moatãplan itãmat, nikitãmat tagien o nãtoãn nãghatãn rãhatimãhal. Koatãn-iarãp mãmã itãmat nãmotãuhlin mãntãatãmat o narmi nat min, kãn motuarisig-in Uhgîn itãm tatãmegãh, kãn in Uhgîn pahrien, <sup>10</sup> kãn nãkoatãsahgîn Nãtin u Iesu, itãm tãmisi-pãn e nego e neai, kãn Uhgîn tãmosmegãh in e nãmisãn, kãn in otosmegãh kitat o nalpãnãn ne nemãha rãha Uhgîn itãm tatuwa.

## 2

### *Wãk rãha Pol ãpãh Tesalonaeka*

<sup>1</sup> Piak min ne winik min. Nãkotitun mãmã nian itimãhal emãhaluwa mãhalehm itãmat, nuwãmãn rãhatimãhal, in sãnãmã tol nat ãpnapãn ãm, mãto tãmol noan. <sup>2</sup> Kãn itãmat nãkotitun mãmã ãpãh Filipae, netãmim kãmotol tãrat kãm itimãhal, kãn motãhai motãn rat itimãhal, mãto Uhgîn rãhatat tãmasitu etimãhal, kãn itimãhal esãhalãginãn nãn-iarãpãn rãhan namnusãn tãwir kãm itãmat, nat ãpnapãn netãmim kãmotalkut mãmã okotã-iãhau itimãhal. <sup>3</sup> Tol nãhlan mãto-inu rãhatimãhal nãghatãn o niuwãn rãhatãmat nãtãligãn tãsietãn e nãtãligãn rat min o nikin itãm tãsãtuatipãn, kãn esãhlalkutãn o neiuã-inãn itãmat. <sup>4</sup> Kãp, esãhalolãn nãhlan. Mãto nian etãhalãghat, ekãhalitun mãmã Uhgîn tãmuag-pãn rãkis e nikitimãhal, kãn tãmãn

məmə itiməhal etəhalahmen məmə etəhalən-iarəp namnusən təwır, kən in təmələhəu-pən e nelmitiməhal. Kən ekəsahləghatən məmə netənim nıkilat otagien otiməhal, məto etəhaləghat məmə Uhgın nıkin otagien otiməhal, kən in Uhgın itəm tatuag-pən e nikitiməhal. <sup>5</sup> Nəkotıtun məmə itiməhal esəhaluwamən otəmat məmə ekəhaliuw nətəligən rəhatəmat e nəghatən ətehen mın. Kən esəhalən-iarəpən namnusən təwır kəm itəmat məmə ekəhalos rəhatəmat məni. Kən Uhgın, in titun nikitiməhal məmə nəghatən u in nıpahrienən. <sup>6</sup> Itiməhal esəhaluwamən məmə itəmat kit o etənim əpnəpın əm kit otıləs-ıper itiməhal.

<sup>7</sup> Kən nat kit mın, məto-inu itiməhal aposol mın rəha Kristo, ekəhalıtun nənən məmə nəkotəkəike motisiai-in itiməhal tahmen e etəm-iasol miləhal, məto eməsəhalolən. Nian etəhlatig kitat min itəmat, nolən rəhatiməhal tımətig tahmen e mama kit itəm tatehm wır nətin mın. <sup>8</sup> Nikitiməhal tagien məmə ekəhalən-iarəp namnusən təwır, məto sənəmə məmə ekəhalən-iarəp əm, məto eməhalol natımnat rafın itəm ekəhalıtun nolən məmə otasitu etəmat. In tahmen məmə eməhalos-ıpinə nəmegəhən rəhatiməhal, məto-inu itiməhal eməhalolkeike itəmat, kən nəmotuwa rəhatiməhal netənim. <sup>9</sup> Piak mın ne wınik mın. ?Nikitəmat tatəht, o kəp, wək əskasik itəm eməhalol? Nian itiməhal emətəhlamnus-iarəp namnusən təwır rəha Uhgın kəm itəmat, itiməhal eməhalol wək e nelmitiməhal laulaugin mətoarus-pən lapın məmə esəhalətəpəh-inən nat kit otəmat.

<sup>10</sup> Itəmat ne Uhgın, nəmotəplan kən motıtun nən-iarəpən məmə nian emətəhlatig kitat min

itamat iafak min, nolən rəhatiməhal in tətuatip, kən Uhgın tətəgien lan, kən etənim kit təsosən nıpəgnəmtin kit itəm tərət otiməhal. <sup>11</sup> Itamat nəkotitun məmə itiməhal eməhalol təwir kəm itəmat rafin təhmen e tata kit tatehm wir nenətin min. <sup>12</sup> Kən e nolən kitiəh əm, etəhalem əskasik itəmat, kən mətəhaliləs-ipər rəhatəmat nətəligən, mətəhalətapəh əskasik məmə nəmegəhən rəhatəmat otətuatip e niganəmti Uhgın, kən nikin tagien lan. Uhgın u, tətəun-in itəmat məmə nakotuwa e nərəmərən ne nəwirən rəhan.

<sup>13</sup> Kən nian rafin, itiməhal ekəhalən tagkiu kəm Uhgın məto-inu nian nəmotos nəghatən rəha Uhgın itəm nəmotəto otiməhal, kən motos tatig e nikitəmat, kən nikitəmat təsəhtən məmə in nəghatən rəha netənim əm, məto nikitəmat təht məmə in nəghatən rəha Uhgın, kən pahrien in nəghatən rəhan. Kən nəghatən u tatol wək e nəmegəhən rəhatəmat, netəm nakoatən nıpahrienən lan. <sup>14</sup> Kən piak min ne winik min, nəmotos nəratən təhmen e niməfak min rəha Uhgın e Kristo İesu əpəh Jutia əpən. Nat əpnəpin məmə ilat netənim imatəmat atip ikin, məto ilat kəmotol terat kəm itəmat təhmen əm e noanol min rəha İsrəl kəmotol tərət kəm iafak min əpəh Jutia. <sup>15</sup> Kəmotohamnu İərəmərə İesu, ne ien min, kən motəhg-iarəp itimat ekotiet. Nolən rəhalat tatol niki Uhgın təsəgienən, kən ilat tikimir min o netənim rafin, <sup>16</sup> məto-inu kotalkut məmə okotən-iəhau itimat o nəghatən kəm İaihluə min məmə Uhgın otosmegəh ilat. E nolən əh, ilat

koatuarġətain rəhalat nolən rat mətoarus tahmen. Məto roiu əh, neməha ne nalpınən rəha Uhgın tinuwa olat.

*Pol təmolkeike məmə otəplan ilat*

<sup>17</sup> Piak mın ne wınık mın. Nian eməhaluwın isəu otəmat nian noan məsın əm, məto eməhalolkeike pik məmə ekəhaləplan mın itəmat. Nıpahrienən, nıpətıtət isəu otat mın, məto nətəligən rəhatat kitiəh. Kən eməhlalkut pik məmə ekəhalitəlig məhaləplan itəmat, <sup>18</sup> məto-inu eməhalolkeike məmə ekəhalımnə otəmat. Io, Pol, emalkut nian tepət, məto Setan təmahtosig-in suatıp otiməhal. <sup>19</sup> ?Tahro ekəhalolkeike pik məmə ekəhaləplan mın itəmat? ?Tol nəhlan məto-inu, nian İərəmərə İesu otuwa mın, pah mın un eməhalələhəu-pən nətəligən əskasik rəhatiməhal elat məmə ilat noa wək wir rəhatiməhal? ?Kən nikitiməhal otagien mın o pah mın? ?Kən pah mın un in rəhatiməhal nətouən itəm nikitiməhal otagien elat? ?Itəmat, o kəp? Əwəh, itəmat u. <sup>20</sup> Nıpahrienən, itiməhal ekəhlausit otəmat, kən nikitiməhal tagien otəmat.

### 3

<sup>1</sup> Tol nəhlan, nian nikitiməhal təməpou kən iuəhkır nikitiməhal titəgıt, məto-inu itiməhal ekəhaləruru məmə nəkotatig təwir əm o kəp, kən itiməhal eməhaləlis nəghatən məmə io ne Saelas ekətuatig Atens, <sup>2</sup> emuahl-ıpınə Timoti məmə in otimnə məplan itəmat. In piatat kit itəm tatol wək rəha Uhgın itiməhal mın o nən-iarəpən nəghatən rəha Uhgın. In təminəh otəmat məmə otasitu

etamat mīlēs-ipər rəhatəmat nətəligən, kən mol itəmat nəkoatətul əskasik e rəhatəmat nahatətəən, <sup>3</sup> məmə nərətən itəm tatuwa roiu, okol təsələn nikitəmat təht pīk. Nəkotitun rəkis məmə in nətəligən rəha Uhgīn məmə netəmim okotol tərət etat nəhlan. <sup>4</sup> Nīpahrienən, nian emətəhlatig kitat min itəmat, eməhaləkəike mətəhalən kəm itəmat məmə okol tərət kəm kitat. Kən itəmat nəkotitun wīr məmə tinuwa mol nīpahrien lan tahmen əm məmə itiməhal eməhalən mihin. <sup>5</sup> O nat əh, nian nikitiməhal təməpou kən iuəhkīr nikitiməhal titəgīt, kən emahl-ipinə Timoti məmə otimnə məplan-tu rəhatəmat nahatətəən, məmə tatəskasik əh, o kəp. Ekatəgīn məmə e suatip kit, Setan u etəmim rəha nos-ipən-os-ipənən, in tos-ipən-os-ipən kəm itəmat, kən wək rəhatiməhal in tol nat əpnapīn əm.

*Timoti təmən-iarəp namnusən təwīr*

<sup>6</sup> Kən roiu əh, Timoti təmītəlig-pa min otimlau, kən matos namnusən təwīr e rəhatəmat nahatətəən ne nolkeikəən. Təmən-ipa kəm itimlau məmə nikitəmat tatəht əh itiməhal e nagienən, kən motolkeike məmə nəkotəplan itiməhal, tahmen əm məmə itiməhal ekəhalolkeike məmə ekəhaləplan itəmat. <sup>7</sup> Tol nəhlan, piak min ne winik min, nat əpnapīn eməhlatig e nərətən, kən mətəhaləto nahməən, mətəo namnusən rəha nahatətəən rəhatəmat tēmīlēs-ipər rəhatiməhal nətəligən otəmat. <sup>8</sup> Nian eməhalos namnusən məmə nəkoatətul əskasik əh o Iərəmərə, kən ekəhaləto məmə enəhalos min nəmegəhən.

---

3:2: Wək 16:1-3

3:3: 2 Tim 3:12

3:6: Wək 18:5

3:7:

2 Tes 1:4

<sup>9</sup> Nian ekəhalətul e niġanəmti Uhgīn, nagiənən rəhatiməhal otəmat in iaħgin, kən ekəhalən kəm Uhgīn məmə nikitiməhal tagien pik otəmat. <sup>10</sup> E nian rafin, nərauiəgən ne lapin, etəhaləfak əskasik məmə ekəhaləplan min itəmat, kən məhaləgətun itəmat e nat naka nəkotəruru əh məmə rəhatəmat nahatətəən otəwiə məskasik.

<sup>11</sup> Kən pəs rəhatat Uhgīn atip, u Tata rəhatat, ne Iərəməərə Iesu rəhatat, kioal suatip rəhatiməhal məmə ekəhalimnə məhalehm itəmat. <sup>12</sup> Pəs Iərəməərə tol nolkeikeən rəhatəmat otepət mər marioah otəmat ne netənim rafin, təhmen e nolkeikeən rəhatiməhal otəmat tepət. <sup>13</sup> Pəs in tol nikitəmat təsanən məmə, nian Iərəməərə Iesu tatuwa min ilat rəhan min netənim, kən nakotətul e niġanəmti rəhatat Uhgīn u Tata rəhatat, kən nəkotətuatip kən nolən kit tikə məmə otiləs pikən itəmat.

## 4

### *Nəmegəhən rəhatəmat təkəike mol Uhgīn nikin tagien*

<sup>1</sup> Piak min ne winik min, roiu ekəike məghat e natimnat min neen. Eməhaləgətun rəkis etəmat nolən naka itəm nəkotol məmə Uhgīn nikin otagien otəmat. Kən pahrien, nəkoatol mihin. Kən roiu etəhalətapəh otəmat kən mətəhalətapəh əskasik e Iərəməərə Iesu məmə nəkoatol əm nulan tatuwin matuwin məsin min. <sup>2</sup> Otol nəhlan məto-inu itəmat nəkotitun suatip itəm eməhaləgətun itəmat lan e nərəməərəən rəha Iərəməərə Iesu.

<sup>3</sup> Nətəligən rəha Uhgīn məmə in təmələhəu kalin itəmat məmə rəhan min məmə nəkoatol nat itəm



tātuatip wir: sotətəu-pənən suatip rəha nipitan ne nəman itəm koatit anion ilat mīn. <sup>4</sup> Itəmat kitiah kitiah nəkotəkəike motərəməərə e nipətitəmat e nolən itəm təwir mətuatip kən katisiai-in. <sup>5</sup> Sotolən nolən rəha nətəu-pənən nətəligən əskasik o nit anionən pətan o iərman. Nolən əh rəha netəm kəsotəfakən kotəruru Uhgīn. <sup>6</sup> Kən e natimnat mīn əh, sotolən tərət e piatəmat mīn o nakləh-inən pətan rəha suah pişin. Iərəməərə otol nalpinən kəm netəm mīn u itəm kotol nolən mīn itəm tol nəhlan, kən enəhalən rəkis nat u kəm itəmat o nəhgaiirən etəmat. <sup>7</sup> Tol nəhlan məto-inu Uhgīn təməsaun-inən kitat məmə okotamkimik e niğanəmtin, məto okotatig e nəmegəhən itəm kəmotələhəu kalin məmə rəhan. <sup>8</sup> Tol nəhlan, etəm tatəuhlin məntaan e nəgətunən əh, sənəmə tatəuhlin məntaan kəm etənim, məto tatəuhlin məntaan kəm Uhgīn itəm təmos-ipa Narmīn Rəhan kəm itəmat.

<sup>9</sup> Nəkotitun rəkis nolən rəha nolkeikeən itəmat iəfak mīn, kən inu sənəmə nat kit itəm ekəkəike məte e naoa, məto-inu Uhgīn təməgətun rəkis itəmat o nolkeikeən itəmat mīn. <sup>10</sup> Kən pahrien, nakotolkeike piatat mīn rafin ikin Masetonia. Məto, piak mīn ne winik mīn, ekəhalətapəh əskasik məmə nəkotol mihin tatuwin nulan məşin mīn.

<sup>11</sup> Itəmat nəkotəkəike motalkut o nətəu-pənən suatip rəha nəmegəhən itəm in təməlinu, kən motol atip rəhatəmat wək, kən nəkotol wək e nelmitəmat təhmen əm məmə eməhalən mihin kəm itəmat. <sup>12</sup> Otol nəhlan məmə rəhatəmat nəmegəhən otiuw-pa nişiaiən rəha netəm ihluə mīn, kən itəmat

4:3: 1 Tes 5:23; 1 Pita 1:16

4:5: 1 Kor 6:13

4:7: Hip 12:14

4:8: Luk 10:16; 2 Kor 1:22

4:9: Jon 13:34

4:11: Efes 4:28

nəsotagileən e suah kit.

*Nuwamən rəha İərəmərə*

<sup>13</sup> Piak min ne winik min. Ekəhalolkeike məmə itəmat nəkotəkəike motitun netəm min u itəm kəmotimis. Kən esəhalolkeikeən məmə itəmat nakotasək tahmen e netəmim itəm kəsotələhəupənən rəhalat nətəligən e Uhgın. <sup>14</sup> Kitat kotahətətə məmə İesu təmimis kən məmegəh min, kən nikitat titun məmə nian İesu otuwa min, kən Uhgın otol məmə, netəm min u itəm kinotahətətə rəkis e İesu nian kəmotimis, okotuwa min ilat İesu. <sup>15</sup> Kən ekəhalən kəm itəmat nəghatən ətuatip rəha İərəmərə məmə, kitat u itəm koatəmegəh əh motatig mətoarus nuwamən rəha İərəmərə, pahrien kitat okol kəsotaupən-inən netəm min u itəm kəmotaupən kəmotimis. <sup>16</sup> Məto İərəmərə ətuatip əm oteiuaiu-pa e nego e neai, kən mən-iarəp əfəməh, kən etəm-iasol rəha nagelo min otagət əfəməh, kən netəmim okotəto təwi rəha Uhgın, kən netəm min u itəm kinotahətətə rəkis e İesu nian kəmotimis, okotəmegəh motaupən motər. <sup>17</sup> Kən uarisig lan, kitat netəm koatəmegəh əh motatig, okotər kitat min ilat e nimal napuə məmə okotəplan İərəmərə e magoagəp. Kən tol nəhlan, okotatig kitat İərəmərə namnun tikə. <sup>18</sup> Tol nəhlan, otıləs-ipər nətəligən rəhatəmat min e nəghatən min u.

## 5

<sup>1</sup> Piak min ne winik min. Təwir əm məmə esətəən kəm itəmat e nian ətuatip rəha natimnat min əh, <sup>2</sup> məto-inu itəmat nəkotitun rəkis məmə Nian Rəha İərəmərə otuwa tahmen e iakləh itəm tatuwa lapın,

nian netəmim kotəruru. <sup>3</sup> Nian netəmim koatən məmə, “Natimnat rafin təməlinu, kən nərātən tikə,” kən nərātən otuwa olat uəhai əm, tahmen e pətan itəm məntaan titahmə o neməkən, kən okol netəmim kəsotagimən.

<sup>4</sup> Məto piak mīn ne winik mīn, nəsoətətulən e napinəpən e natimnat mīn əh, kən nuwamən rəha nian əh otəsolən itəmat nəkotaut tahmen e nuwamən rəha iakləh kit. <sup>5</sup> Itəmat rafin nenəti nəhag-əhagən ne nenəti nianən. Kitat sənəmə netəmim rəha lapin ne napinəpən. <sup>6</sup> Kən tol nəhlan, pəs kəsotolən tahmen e netəm mīn u ko-tapil, məto pəs kotaiir kən moatehm wir rəhatat nətəligən ne rəhatat nolən mīn, <sup>7</sup> məto-inu netəm mīn u koatapil, ilat koatapil lapin, kən netəm mīn u itəm koatapis, ilat koatapis lapin. <sup>8</sup> Məto pəs kitat kotərəməərə e rəhatat nolən mīn, məto-inu kitat netəm rəha nianən. Pəs kotaskəlim nolən rəha nahatətən ne nolkeikəən, inu tahmen e mopael kit itəm tatuwin-in iaen kit itəm tatətlosig-in manikiləhatəm, kən pəs kotələhəu-pən əskasik rəhatat nətəligən e Uhgīn, inu tahmen e mopael kit itəm tatuwin-in hat əskasik kəmol e iaen itəm tatəfətain rəhn-kapətəm.

<sup>9</sup> Pəs kotol nəhlan məto-inu Uhgīn təsitəpunən kitat məmə neməha ne nalpinən rəhan otuwa otat, məto təmitəpun kitat məmə in otosmegəh kitat e rəhatat Iərəməərə Iesu Kristo. <sup>10</sup> Təmimīs otat məmə kitat kotitun natigən kitiah kitat mīn okəmə koatəmegəh o kəmotimīs. <sup>11</sup> Tol nəhlan, otiləsipər rəhatəmat mīn nətəligən, kən otasitu etəmat

**5:2:** Mat 24:42-43; 2 Pita 3:10; Nol Əpən 3:3      **5:3:** Mat 24:39;

Luk 21:34-35      **5:5:** Rom 13:12      **5:8:** Aes 59:17; Efes 6:14,17

**5:10:** Rom 14:8-9; 1 Tes 4:14

min mēmā natol nahatətəən rəhatəmat təkasiik. Pahrien, inu nolən itəmat nəkotol u-roiu.

### *Namnun nəghatən rəha Pol*

<sup>12</sup> Piak min ne winik min. Roiu ekəhalətapəh otəmat mēmā nakotisiai-in netəm min u koatol wək əskasiik itəmat min ilat, moatərəmərə etəmat e lərəmərə, kən moatən kəm itəmat nian nəkoatol tərat. <sup>13</sup> Otisiai-in wir ilat motolkeike ilat o wək itəm koatol, kən motatig e nəməlinuən itəmat min itəmat min. <sup>14</sup> Kən piak min ne winik min, etəhalətapəh əskasiik mēmā nakotəghat əskasiik kəm netəm min u kəsotolən nat kit. Otələs-ipər nətəligən rəha netəm nikilat təpou. Otasitu e netəm itəm rəhalat nəsanənən tikə. Otol rəhatəmat nətəligən təfəməh kəm netəmim rafin. <sup>15</sup> Okəmā suah kit otol nat kit təsahmenən etəmat, kən itəmat nəsotalpənən nitai nəratən, mətə nian rafin, itəmat nəkotəkəike motalkut mēmā nəkoatol təwir kəm itəmat min ne netəmim pisin min.

<sup>16</sup> Nikitəmat otəkəike mətagien nian rafin; <sup>17</sup> kən moatəghat kəm Uhgın e nəfakən nian rafin; <sup>18</sup> kən nian rafin otən kəm Uhgın mēmā nikitəmat tagien, nat əpnapin nəkotatig e nəwirən, o nəratən. Otol nat miləhal əh mətə-inu iləhal nəwia Uhgın otəmat e Kristo Iesu.

<sup>19</sup> Sotahləmisən nigəm rəha Narmin Rəha Uhgın; <sup>20</sup> əsotənən mēmā nəghatən itəm Uhgın təmos-ipinə kəm suah kit, in tol nat əpnapin əm lan. <sup>21</sup> Otəplan wir kən motakil wir natimnat rafin, kən otaskəlim tiəkis nat itəm təwir; <sup>22</sup> kən motapəs natimnat rafin itəm tərat.

<sup>23</sup> Pəs Uhgın pısın əm itəm in Uhgın rəha nəməlinuən, otol itəmat məmə rəhan pısın əm un itəmat. Pəs Uhgın otol məmə narmın rafin rəhatəmat, ne nəmegəhən rafin rəhatəmat, ne nıpətıtəmat rafin okotətuatıp məmə nıpəgnəmtin tikə otəkul-pən etəmat nian rəhatat İərəmərə İesu Kristo tatuwa mın. <sup>24</sup> Etəm tətəun-in itəmat, nian rafin tatol rəhan nəghatən, kən in otol natimnat mın əh.

<sup>25</sup> Piak mın ne wınik mın. Otəfak otımat. <sup>26</sup> Otən təwır kəm itəmat mın təhmen məmə itəmat kitıəh əm e Kristo. <sup>27</sup> E nərgi İərəmərə, iatən əskasık kəm itəmat məmə nakotafın naoa u kəm piak mın ne wınik mın rafin.

<sup>28</sup> Pəs rəhatat İərəmərə İesu Kristo otawte-in rəhan nəwırən kəm itəmat.

**North Tanna New Testament**  
**The New Testament in the North Tanna Language of**  
**Vanuatu**  
**Le Nouveau Testament dans la langue du Nord Tanna**  
**de Vanuatu**

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 22 Nov 2019

46e9a2b5-26b8-5301-a079-623f3a20ef8b